

蓮洋詩鈔

冊二

通雅

蓮洋集卷第四

河中 吳 雯 天章著

後學浮山張體乾確齋校

贈閩鄉葉涿洲令君

森森鼎湖秋轟轟荆山立河濱隔烟火遂已異鄉邑使君善爲政聲華久相襲
署看懸魚靜野念飛鴻集何嘗廢嘯咏實亦仗安輯繫余違京輦捆載白藤笈
風流施慨慕河潤敢重裊屢傾歌頌遍未覺霜露濕相逢慊夢思知不賤車笠
將之閩鄉書貽同學道者

河上西風慘別顏通津明日是潼關時驚橘綠橙黃後路入秦頭號尾間衰病
羞窺阿對井遷延愁過女郎山軒轅九鼎知何處湖縣茫茫下白鷗

河上望永樂歷歷然感咏

河勢衝冰水倒迴兩山寒色逼人來鄉園雲樹雖相望客路心魂轉更哀倦馬
爭投盤豆館飢鳥空噪赫連臺勞生碌碌真何益欲訪盧敖鍊玉胎

王官谷

朱樓覆殘雪花葉無冬春衆水急爭壑一峯閒對人白雲識心素空谷留皇醇
晚來鷗鷺侶接翅桃源濱

岑儲皆有此調
儲較伉俪耳

送陳子厚之燕二首

玉溪東畔柳如絲腸斷人間折柳時寄語春風道珍重桃花山店夢斑驪

涉筆便
妍妙

意氣縱橫上國游巖廊猶有白雲求遭逢便奏甘泉賦豈但才名動五侯

贈道者四首

太乙茫茫不可尋人間甲子任銷沉山中爲訪樓居客行過白雲紅樹深
千仞飛梁地下橫雲光霞彩滅還生天台聞道多松樹獨躡靈溪自在行
獨坐空山草木香雲深雞犬聽微茫閒居便可消塵劫豈但仙家日月長
山色依然太古時高松亦有萬年枝不知採藥人何處定在溪南又看棋

寄展芝亭並謝送花樹四首

受姓遙從公子展樂易猶存柳下風十載勞形到爾女況復昭穆本然同
海棠兩株嬌可憐買須三百青銅錢暫應忍醉不沽酒換取風光二月天
向來種樹稱篤喜老來猶教此興偏愛爾素心能贈我滿車送到不論錢
青李來禽白給藤函封久不及囊盛忽然惠我亭亭植不待交春種始生

將再之吳門四首

無端浪跡入吳天彈指風光已七年

予癸卯
曾客吳

可奈壯游終未已東南山水又因

緣

蠻語吳歌半不知沙棠青雀影參差行人多上真孃墓酒客嘗留短簿祠
綺戶雕窗障綠紗笙囊夜半嚼紅霞不知此去長洲苑還有當年小玉家
迢遞關門唱五噫那能佳麗減鄉思可憐也有凌雲筆只與吳儂較竹枝

次闕鄉

林響苦無定還愁未渡河夢回鄉路近秋老客思多投分嘗輕賤文章日坎壈

百年能幾日禁此數蹉跎

虞姬怨

嬴秦既失鹿豪傑各經營君王恃神武成敗心俱輕鴻門捨劉季視之如孩嬰
阿房供一怒火照咸陽城富貴思故鄉錦衣羞夜行因循失天意漢軍皆楚聲
帳下始悲歌妾心早分明一死何足道貽君無令名

射雉詞

雉飛麥田雄引雌馬上少年弓箭隨吁嗟雄飛雌不知寄語少年莫放箭人情
誰不重分散快刀健馬弓復強何不射虎西山崗

登虎邱

舊說王珣宅今說真娘墓欲問主者誰今人自來去達士惜迅速數有題名處
我亦登此山徘徊立烟樹蠻氣每含雨風葉各翻露延賞猶未窮鐘聲白雲暮
因思百年後文章亦成誤三數出山門山花覆樵路

吳門逢春感賦

少小不自立生計苦依人夢怯廣陵雨神傷揚子津揚子風高不可渡行人盡
立江頭樹日落江城早閉門草草相隨片帆去才過京口是丹陽曉起推篷船
滿霜寒雁蕭蕭迴遠浦啼鳥啞啞立殘楊殘楊不可挽嫋嫋淩霜散我欲維舟
一問津長條未繫風吹斷吳關漸近吳語多舟人來往皆吳歌可歎相逢不相
識匆匆迴首各乘波乘波去不已同棹吳江水江客方過野埠西郡樓忽見青
山裏城裏城外梅花新官街不雨亦無塵烏鵲橋邊窺扇客錦帆涇上捲簾人
閒情已說風光好酒船日日聞門道自恨黃金不繞身轉覺無顏對花草歸來
愁坐晚鐘聞拂拭吳鉤到夜分江上久無嚴僕射月明誰是謝將軍追惟始道
此行誤翻自來時想歸路江山日遠路日長況復飄零歲方暮鎮日思歸不得
歸江南轉眼又芳菲可憐謬逐稻梁客空負山中蘿薜衣幾回遠望百憂集歸
來又向官橋立黃鸝巷口草青青厭見春風等閒入百歲能勝幾浪游徘徊獨
倚仲宣樓丈夫事業須早立莫使蹉跎成白頭

江樓寄懷宋中故人

二月春歸楊柳條廣陵風雨日蕭蕭題詩不到忘憂館走馬何年海雁橋江上
歸心憐草色城邊晚景惜花朝梁園賓客天涯在空聽鐘聲落暮潮

有風
調

送張翼雲之馬首兼語續方山之游二首

春雨濕桃花匹馬花中去若過神福山爲禮緇經處
長者何生滅白雲空復情雪中有鴻爪松下看題名

西園宴集二首

峨峨九峯秀人家山水半草堂誰結構幽思玉溪畔相過忘主客石上青精飯
雲來松際陰泉到竹根散美人雙荷葉嬌歌再三勸莫惜金縷衣浮生幾昏旦

此亦不減泉遶漢
祠外雪明秦樹根

美人既已歌千觴客當御風景況融和梅花作芳樹神仙山海事傳聞遠多誤
何如乘早春卽此琴樽具會意默無語流目靜皆趣窈窕竹林西莫忘題名處

七夕同斐然旦復集張水部一畝山池得河字

中夜大
雷雨

渺渺雲中駕，盈盈天上河。螢偏露淺水，扇尚掩輕羅。銀漢寧攜石，風雷欲化梭。遙憐小兒女，巧拙果如何。

贈許紫峯

散髮西巖醉，人間許遠游。宰官推道業，狎客愛風流。日月銷碁局，乾坤任鹿裘。相逢先一咲，吾道本滄洲。

小集晴雲書屋二首

愛爾讀書處，晴雲遶舍斜。迴風猶墜雨，映日尚成霞。碧蔭一庭竹，紅垂滿徑花。遙天有孤鶴，掠影過圓沙。

爲趁涼風至，陶然共綠樽。座移花近眼，逕轉屐留痕。醉凭烏皮几，閒吟秋樹根。歸來鳳池曲，山月湧金盆。

題借山人行脚圖二首

一衲自蹣跚，雙屨信來往。周行四天下，不出鉢盂上。脚底千山遍，天台尚未曾。石梁還待我，同作打包僧。

再題借山行脚圖三首

一峯毛女一峯蓮一似香爐覆紫烟奇句久堪凌謝朓直須攜去問青天

師有三峯

詩甚奇

言滿天下無口過行滿天下無怨惡卽此真是無爲法豈必兀然坐觀樹

現居士身而爲說法

三松屈曲偃蒼龍行過袈裟葉葉風濡足褰裳對溪水知師原不愛神通

崇效寺雪塢上人種竹詩

崇效窗前竹幾竿移來依舊碧檀欒敲風忽醒三生夢過雨真添五月寒龍奮九霄驚霹靂鳳翔千仞愛琅玕塢中多少峨嵋雪好養靈根歲歲看

題張別駕浣烟樓二首

信道樓居好頻來說息機綠楊掠波起白鳥破烟飛勝日坐忘曙彈箏聽不歸舊山拋歲月閒煞釣魚磯

澤畔愁爲客招攜興轉多窗移烟際舫岸對雨中蓑花笑三更笛燈明子夜歌

白魚何處買剛道網船過

題袁士旦小照卽以爲別

二月來京師京塵何浩浩昨日涼風至只覺還山好之子雲鶴姿讀書窮要眇
衣拂敬亭雲酒醒新豐道匆匆得握手真快機緣巧風前倚轡轡意氣切雲表
畫師復何人精思入窈窕能寫慷慨胸玉立傍修篠恨不攜之去空谷伴清曉
世事閱始深大道求愈杳不敢天下先苦縣昔所寶願以贈臨岐堅貞永相保

圖作劍俠蓋以此諷
之亦古人贈處之義

贈張漢如二首

座中有客能吳語知在江南住幾年鱸膾蓴羹風味好遙情猶念早梅天
穹窿山下五湖舟十五年前我舊游何日更同張翰去木奴重買一千頭

寄張觀察兄時將由中州還里二首

分手惜匆匆筵前燈燼紅牂牁春信息伊洛客行蹤遠道意難盡臨岐言未終
生平感高義尊酒幾時同

悠悠踏曉霜三日過漁陽問路水村遠懷人秋夜長旌麾雄遠傲書劍愧山堂
風雪邯鄲道騎驢入大梁

贈張本之

青門客散悵寒烟上谷相逢小雪天尊酒喜同千里外素心久嚮十年前還山
待過嵩陽寺投轄重吟寶劍篇嘆息隋珠輕彈雀歌狂方便是因緣

飲薄聿修孝廉宅

愛竹因買竹五畝中條陽清陰已三年不得還山莊愁來挈酒伴痛飲情慨慷
吾子冰玉姿愛我傾百觴昨偕嵒阮徒取醉叢菊傍世緣我久廢欲窮廣莫鄉
子能致通顯立身以文章出處幸有托長嘯襟淋浪捲簾燈燭前天高聞雁翔

庚申仲春寄子文贊府三首

時住永樂風雪薄醉閱
趙帖遂書牘尾奉達

松雪蘭亭跋語奇閑邪規矩又誰師臨風却想翩然閣正是更闌鬪茗時

想見子
文風致

疑義何人可較量風燈薄醉靜琴張病妻却上平原帖鹿脯端能遠寄將

時婦
病甚

才子風流官閣新簪花定復解通神歸來耳熱思甘蔗擬作山陰雪後人

送汪郡丞之官渭州公子文升侍往二首

受命輕千里承恩出禁闈辭燕筇罷鼓度隴騎如飛幕府紅鹽近軍容黑水圍
天寒頻講武大雪滿弓衣

公子才無敵詩名世久傳嚴裝書自裹絕徼檄頻宣花壓蜻蜒帽烽銷腰褭鞭
往來關陝北須到草堂前

寄謝雲墅翰林二首

陳常

古道誰能重相看意獨真文章原自貴情性本然醇有夢寧皆妄題書遠更親
正須安樸拙蔚作廟堂珍

去矣王官谷冬深尙少留遙思雙瀑布千仞掛寒流黃鵠飢猶叫青羊遠莫求
湖田三日雪傳語暫消憂

近傳里門多雨雪

香泉

香泉鹿城大忍寺泉也陳子文使君飲而甘之
構亭其上名之曰香泉余過題詩遂以爲別

乳窟有蝙蝠千歲化爲白微軀何足戀生理尙知惜嗟哉丈夫身昂藏儼七尺

胡爲竟貪冒天機日狼藉甚愛必大費珠玉嘆輕擲十月鹿城道小憩越阡陌
偶酌泉水香感慨風生腋將無無熱池於茲潛遠脈使君具懸解構亭着雙屐
銀屏汲鉛華石鼎鍊金液倏忽得要妙疾如馬馳驛更喜金界近寶閣鎮潮汐
碑古薤倒披經富蓮橫積寺有隸碑甚古金藏一部積篋中恨不謝塵累久住濯精魄纓組君
正煩饑凍我方迫題詩留碧玉灑酒振歸翮一水一切水浮幢何間隔大道本
無負交臂豈創獲兩兩素心存終古照泉石

讚嘆寺

寺在萬固峪後產黃精有潭澄潔在門外

讚嘆何年寺千峯擁石龕竹根侵講席花蕊落經函紫蕨烹來嫩黃精曬後甘
下方昨夜雨雲氣滿龍潭

論書答子文大尹

句曲論書已杳茫江陵劫火更凋傷參差疊礧鵝羣字顛倒山陰薤骨方撥鐙
微言寧石室畫沙真諦豈雲陽傳疑傳信須裁取莫但隨人築道傍

壁上見子文大尹題句

昔人抱犢三年學我亦香泉兩月停
破塚不須求筆法牙籤檢出翰林經

大悲院禮懺

波光無點塵一舫是通津
遙辨風幡影同參初地人
天花晴更落枯木老能春
懺罪安心後都捐妄與真

欸乃書屋爲笨山作

舍人讀書處近傍漕河濱
豈效臨淵客常逢曬網人
冰開魚弄藻花落鳥啣春
愧我風塵久淹留愛白蘋

喜世高禪師過欸乃書屋

退居習定久攜杖躡蒼苔
偶爾示出入何曾有往來
霞生紅逐舫茗熟綠盈杯
我欲呈金偈烟波失善財

龍在田梁芟梁叔敏兄弟同集欸乃書屋

慰我羈栖客相過趁曉風
偶隨津柳綠同看海霞紅
殘雪猶霑屐新詩各滿筒

莫教文字障問義有支公

謂世公也

留別張振宣二首

尙憶西園醉徜徉坐竹林門前流水靜堦下落花深歲月驚彈指天涯惜滯淫
碧桃歸路好回首發清吟

別去翻相憶何時方是閒人同嵇阮侶交在紀羣閒釀借崑崙水窗涵湖縣山
讀書契懸解應獲駐朱顏

和贈沈客子

浪跡忽約秦川湄涇水且涉數斗泥江南息壤苦不遂君買湖船余馬蹄麟脯
鳳胎寧可致夜半吻燥當以蠶中條松桂久荒蠹枯楊癡計或生稊呦呦思近
華山鹿祝祝復遠尸鄉雞惟君洞庭三萬六千頃林屋曲巘諧幽棲移家就彼
不爲惡鳥犍驅出雲峯低葛花中谷正莫莫瑤草對岸方萋萋少君偕隱鹿門
等身甘裙布手則蕘取婢莫漫攘桃葉生兒已見過祁奚寒巖枯木俗不徹何
宜以肉周宜妻嗟余種種百苦集世間那有蠲愁犀白藤捆載待西下爲君一
日權相稽春雨微吟倚齋閣征衣如擁僧迦黎詩成君取伴魚稻客散誰仍供

犢鼻五松偃蓋蔭石竇一鳥度枝窺藥畦浮生半日閒亦好喧寂休較智與迷
却喜玉井蓮花近復近儘可作此山中之人兮

春雪曉望

密霰夜已零杳靄漕河路朝來南浦望誰躡東郭屨柴門半隱顯靜掩溪邊樹
一鳥破烟飛有人雪中渡

宛然
畫圖

韓維藩席上留別時欲游洛

久說盧巖好南來趁曉風征驂愁蹀躞仙佩想丁東坐上客頻起樽中酒未空
懷人有佳句伊洛正飛鴻

送商築民還海門

綠柳陰陰黃鳥啼與君走馬來關西臘雪紛紛等飛絮送君踏雪海門去天涯
同君皆賤貧感君義氣何其真重君家世尙書後慷慨燈前一樽酒家無儋石
意何如貧少黃金富有書尋常讀史具深識論古縱橫仍起予君不見曼倩當